

陽春縣志卷之十三

事記

分國紀事始於春秋之世魯晉楚有史府縣有志一也魯史於列國赴告皆書之冊以一國而載天下之事府縣志則非所屬者畧焉其以年緯之者猶春秋編年體也舊志事記於吾邑治亂之迹特詳然自陳永定以後清嘉慶以前無大變故發生獠獠獠蛋間有蠢動皆一鼓盪平成豐元年吳瓜四黎四貴江阿戊等一再陷邑城咸豐十一年迄同治三年髮狁相繼竄擾狁尤慘無人道四境以內田疇荒蕪村落邱墟人口死亡過半為置縣以來未有之巨變亂事甫平三合會匪又接踵而起禍亂相尋者六七十年此何故歟堯典曰播時百穀曰敬敷五教曰疇若予工曰懋遷有無化居四民并重自昔然矣吾邑民俗貧者服田力穡富者食租衣稅業工商者蓋鮮咸同以

卷十二

一

後生計日艱習尚日侈租稅不足以供衣食筋力不足以任耰鋤道義不足以範身心遂成為天地間之游民馴至成為天地間之莠民奈之何不窮且盜也予編志至咸同事記而悲之竊謂欲吾邑之長治久安自無游民治官斯土者其念諸哉生斯土者其念諸哉

陳

永定二年十二月高梁太守馮寶卒海隅擾亂寶妻洗氏懷集部落數州晏然其子僕生九年是歲僕帥酋長入朝詔以僕為陽春太守大建元年己丑春正月廣州刺史歐陽紇反陽春太守馮僕發兵拒之

陳高宗以紇久在南服頗疑之詔徵為左衛將軍遂據廣州反陳遣車騎將軍章昭達討之紇召僕至南海將誘與同反僕遣人告其母沈夫人夫人曰我為忠貞經今兩代不欲因汝輒負國家仍

發兵拒境帥百越酋長以迎章昭達及紇伏誅陳封馮僕為信都侯母洗氏為石龍郡太夫人其後僕之子盎亦有平廣州功

唐

武德五年漠陽太守馮盎承李靖檄帥所部降以其地為高羅春白

匡儋林振八州

開元十年秋八月流吏部姜晦於春州

唐書初上之誅韋氏也王皇后頗與密謀及即位數年色衰愛弛武惠妃有寵陰謀奪嫡后心不平時對上有不遜語上愈不悅密與秘書監姜皎謀以后無子廢之皎洩其言嗣滕王嶠后之妹夫也奏之上怒張嘉貞構成其罪云皎妄說休咎杖六十流欽州晦貶春州司馬

十六年戊辰春正月春瀧等州獠反命宦官楊思勗平之

卷十二

一

春瀧等州獠陳竹範與廣州獠馮璘何遊魯反陷四十餘城行範稱帝乃以思勗為驃騎大將軍發桂州及嶺北近道兵討之破行範於瀧州擒遊魯及璘行範逃雲際盤獠二洞思勗追捕竟生擒之春瀧悉平

獠 粵東有峒獠嶺表溪峒之民也古稱山越唐宋以來開拓浸繁自邕州以西皆推其酋長為首領籍其民為丁壯其依山林而居射生為業無隊長版籍不可羈縻者謂之山獠虞衡志所謂蠻之荒忽無常者也有海獠岳珂程史云番禺有海獠雜居其最豪者蒲姓號曰番人本占城土人因浮海遇風憚於往反乃請於其主願留南方以通往來之貨歲久定居城中屋室侈靡富盛甲一時 按此所云春瀧等州之獠蓋洞獠也所云廣州之獠即程史所謂海獠也

元和十二年十一月貶董重質為春州司戶

董重質為吳元濟謀主屢破官軍上欲殺之李愬奏先許重質以不死乃貶之

咸通九年秋八月貶禮部郎中魏瓘為春州司馬

舊唐書瓘與右諫議大夫高湘比部郎中楊知至刑部員外郎崔彥融等並坐同中書門下平章事劉瞻親善為韋保衡所逐瞻貶

康州刺史故篋等俱坐貶

宋

皇祐二年庚寅十一月廣東轉運判官祖無擇按部至春州

熙寧二年己酉廣東轉運判官周惇頤行部至春州十年丁巳孟夏

廣東轉運判官許彥先按部至春州乾道九年癸巳大旱

咸淳二年丙寅冬大有年禾有三穗者

元

泰定二年饑賑糶有差

至正三年三月辛未安置伯顏於陽春縣

元史伯顏先任中書大丞相黜為河南行省左丞相後有是命

至正二十六年丙午恩州胥戶何均受殺偽元帥吳元良襲其號仍

據州城及陽春

卷十三

三

胥戶 秦始皇使尉屠睢統五軍監祿殺西甌王越人皆入叢薄中莫肯為秦當即叢薄中之遺民耶其人善泅入水皆繡面文身如蛟龍狀行水中三四十里不遭物害故又曰龍戶婚配以歌相贈答無冠履禮貌不諳文字以舟楫為家捕魚為業或編蓬瀕水而居不敢與齊民齒雍正七年特命有司聽其登岸於近水村庄居住與齊民同編中戶以便稽查並勸諭開墾荒地力田務本以示一視同仁至意誠從古未有之曠思也若夫思患預防毋使人海而跳梁是在善牧民者

明

洪武元年戊申十一月征南將軍廖永忠擒何均受於白石港戮之

三十一年戊寅西山猺盤窮腸等作亂指揮王濬等討平之

天順二年戊寅新春猺叛肇慶知府黃瑜撫而用之

瑜威望素著乃檄猺酋潘宗德等至府庭諭以禍福加以恩信其

黨畏服誓為報効遂率衆防禦要害流賊屢至輒敗新春一路數

年賴之以安

猺人 猺古盤瓠氏種也產於湖蜀溪洞間即長沙黔中五溪蠻其後滋蔓數千里南粵在在有之陽春山林深僻逕路險阻故猺多來居其人衣斑斕布褐椎髻跣足言語侏儻刀耕火種以砂仁豆蔻楠木藤漆為利無甚蓄積居處無定出入持弩佩刀多藥矢中之必斃又能涉險峻如履平地兒始能行即燒鐵石烙跟蹀使頑木不仁故棘茨不能傷其姓為盤藍雷鍾苟自相婚姻其配合多以賽神會男女俚歌相贈答適意而偶喪葬則作樂歌唱謂之煖喪暇則相聚射虎逐鹿飲酒沈酒擊長鼓舞以為樂喜仇殺猜忍輕死往往嘯聚肆掠朝服夕叛不可維以恩信此古昔之猺俗也今已殲滅存無幾矣

六年壬午大水

潦水暴漲旬日壞官民房屋溺人畜冲陷田地

成化二年丙戌刺竹實而枯次年大饑

五年己丑西山賊陷陽春城兵備僉事陶魯來援殺賊甚衆餘黨遁去

十五年己亥猺賊寇陽春兵備僉事陶魯擊走之

魯率兵至賊驚走追入其阻魯欲乘勝剿滅龐峒等山以里排不結而止

宏治元年戊申正月有蝗冬十一月大雪

八年乙卯六月地震

十五年壬戌猺賊八十餘人入陽春燬縣治劫庫藏總旗徐洪出禦死之

卷十二

四

正德六年丙寅九月大水

時洪水穿山不辨河道摧陷田屋無算太平都蒲沼山及井邊山頽旗鼓山鳴

七年壬申兵備僉事汪鋹討陽春猺賊敗績

先是猺賊不靖鋹督兵進討以石綠獐子為向導獐潛與猺通謀引入深險官軍大創始悟其奸自是不敢言用兵矣

獐人 獐性質粗悍露頂跣足花衣短羣鳥言羣面自耕而食出湖南溪洞後稍入廣西古田等縣佃種因討猺蠻招入廣東其種與猺異而桀驁之性則同有田之家願籍其力以捍猺其後狡焉思逞猶之猺人前明汪鋹誤用之而敗其覆轍也今則恩威溥被元腫皆馴獐人即吾赤子也何異類之可云

八年癸酉春旱既又甚雨歲不穫遍地刺竹花實可食

十年乙亥秋地震刺竹又實

冬白飯坑擔板嶺猺賊梗道殺人知縣黃寬率鄉兵撲滅之

十一年丙子六月大水八月十五日潦漲尤甚並頭蓮產於舊學君

子池三並蒂蘭產於尊經閣下一蒂三花

十四年己卯恩平賊首蘇萬里陽江賊首馬文廣流劫陽春總督御史楊旦等分道剿平之

萬里文廣合夥數千流劫陽春恩平新興等縣境屯聚蓮塘樂安之間道梗不通總督御史楊旦總領太監王堂總兵撫寧侯朱麟及分巡道某知縣黃寬分道剿之擒斬九百七十餘人俘獲賊屬二百四十四人地方始平

嘉靖二年癸未十一月猺賊掠陽春兵備副使王大用參政羅僑次第擒獲之

陽江賊首嚴院聚衆侵掠陽春十一月大用統兵追至龐峒擒之十二月僑兵繼至斬獲甚衆嗣後屢犯屢遁歲無安堵

三年甲申參政羅僑招復猺目梁烏皮等三百餘家

卷十二

五

五年丙戌五月大風拔木十月地震

六年丁亥六月朔陰雨如注初六日颶風大作毀猺居猺賊多溺死者

時白晝晦暝山谷震響凡猺穴銅窩鐵峒蒙村合水夾頭中寮弔澗等村百山一時崩摧猺民三十餘處盡遭淹溺死猺賊三百餘人賊首黎廣雄倖免沙石堆積民田為淤尋丈大木漂浮於江踰年不絕

十二月己未邑火

從西廂營起值西北風延燒西郭民居死者十餘人尋燒入城燬民屋延及學宮西齋共百餘家次年十一月西郭復災焚五十餘家

七年戊子兵備僉事李香按陽春招諸投猺者復業

猺山藪盜官兵莫敢誰何新興陽江新會頑民先後投猺為亂者二千餘人香至悉招還各復其業民賴以安

十年辛卯陽春猺賊趙林花等攻陷高州提督都御史陶諧總兵官咸寧侯仇鸞討平之

賊首趙林花黎廣雄等一千七百餘徒攻陷高州軍門調兵七萬以正月十五日分道進剿至四月十五日凱旋巢穴迅掃又實以良民千餘家復田賦一百三十九頃九十一畝零

十一年壬辰冬大雪次年大熟

十二年癸己都御史陶諧總兵官咸寧侯仇鸞討陽春新興德慶諸賊平之

先是陽春縣西山雲廉叅峒湖峒坐羅下雙茶場賊首趙林花唐觀政唐朝用盤勝富何總管郭安富與德慶州東山南鄉葵嶺賊

卷十二

六

首鳳二全師安盤僧堂新興王三坑石壁等巢賊首盤晚大鄧大弟盤世寬皆恃險聚衆剽掠鄉村殺擄男婦攻高州城庫拒殺官兵縱橫騷擾已數十年至是諧等調兵分道並進攻搗巢穴一百二十五處擒斬三千七百九十九名夥俘獲賊屬三千七百二十名口有留石亭記西山銘以紀功績

見藝文

十四年乙未夏五月大雨殺稼斗穀百錢御史戴璟賑活甚衆奏蠲民租

十五年丙申大旱復饑民食草實餓死甚衆

十六年丁酉大水

二十一年壬子大旱

二十三年甲寅浪賊麥長裾攻破陽春縣知縣謝復生討擒之長裾及黎汝誠顧本通等劫掠思良等村知縣謝復生躬自督捕

奪回男婦五十餘人復立賞約令招主嚴君玉密同猺人盤光眼計擒長裾解軍門斬之當道各加獎勵焉

三十四年乙卯顧本通仇乃從王三坑劫掠順陽思良等村復生仍請南韶兵備道遣指揮舒英煥帥狼達官兵剿散之

三十七年戊午提督都御史王鋹遣官剿德慶高要陽春等縣賊討平之

新興紅嘴山四會扶溪山諸賊已平尚有德慶瀧水陽春等州縣連界王三坑鐵場石人背山棗等坪賊巢盤踞萬山之中巖谷險峻林菁叢密賊首盤永賢劉毋正梁德業皆稔惡渠魁招集狼徒流毒無已嘉靖癸未丙辰兩次大征官兵失利故久不征剿是年調廣西那地等州狼兵往潮州協剿倭寇同知呂天恩密訪鄉導得各賊踪跡因言狼兵高要入僅一百餘里自德慶入不滿二百

卷十二

七

里各啣枚疾走一夕可至出其不意賊可成擒軍門行嶺西道會同統督參將鍾坤秀分所部為三哨令監督右哨都指揮蔡禎出瀧水江沙田登陸進剿山棗坪五巢中哨都指揮胡有名由肇慶南岸登陸進剿鐵場六巢左哨指揮張機由肇慶南岸登陸剿石人背仍招集鄉夫打手民丁猺丁獐夫並密飭陽春瀧水高明等縣於賊出入處集鄉勇藏伏以防奔逃分布周密乃督率三哨官兵尅期於八月初二日抵巢撲剿賊壘山插箠據險迎鬪官軍奮勇擊之擒斬七十二名賊集雲浮大山又督兵併勢攻之斬獲賊首盤永賢等二十八名其為伏兵所斬馘者又四百七十名俘賊屬及奪回被擄男婦甚夥奏凱而還

四十年辛酉東山西山猺獐又恣延至四十三年旋招旋叛

隆慶元年丁卯夏五月猺賊流劫

三年六月地震

五年辛未九月初六大風拔木揚沙

六年壬申大饑斗穀八十文死者無算城外尤甚邑人賴秋揚捐米
糲粥多所存活生員陳五教捐金收瘞餓殍道無遺屍

萬歷三年乙亥東西二山猺獞復叛四年丙子總督凌雲翼肇慶知
府楊棐討平之

時猺獞叛服不常諸縣無籍之徒互相盤結如羅旁等處之水路
二十四山及獨鶴恩平蓮塘樂安之陸路嘯聚肆掠商旅不通至
是雲翼暨棐率兵平之次年四月班師仍立善後兵耕守其地奏
陞瀧水縣為羅定州置東安西寧二縣屬之又立副總兵署於兩
山之中設南鄉富霖等所分禦各隘民賴以安

四年丙子析陽春猺田湊立東安縣

卷十二

八

總督凌雲翼既平羅旁猺賊立東安縣乃割陽春之雲廉通根北
海三洞黎澇鐵峒謝存榕木岡上沙豐峒黎埗等猺田稅米五百
九十四石二斗零七合湊之以為縣

六年戊寅正月大雨雹

九年辛巳五月大雨太平都流陷田地無數鸚鵡山裂聲響如雷山
下突成一潭其深莫測又一石八面如刀削

十五年丁亥八月五日大風敗屋拔樹

二十四年丙申春大饑斗米銀二錢餓殍滿道

三十九年辛亥笏竹花實

四十六年戊午冬十二月大雪

晝下如珠次日下如鵝毛六日至八日乃已父老皆言從來未之
見也連歲皆稔

崇正元年戊辰春大旱穀貴

五年壬申夏四月疫

十七年甲申永平營統兵把總嚴祚珪擒賊首崔志相又率四隅練總鄉勇進征白蓮教賊戰於大垠那雄等處勝之

清

順治四年丁亥賑給難民

是年初定陽春東西二山賊黨大發三月初八日圍陽春城連結各縣無俚子數日聚衆萬餘攻半月城不破值高州回巡兵至大敗之賊黨悉平而城外關廂房屋悉遭摧毀矣

五年戊子春夏間大饑斗米銀五錢民多流亡有以斗米易一子者八年辛卯邑諸生始應鄉試

九年壬辰蔣以瓚進剿東山獲賊首黎瓊飛瓊雲瓊日等斬之又進

卷十二

九

剿西山賊敗張七等於黑石岡賊遁

十年癸巳大饑三四五月穀騰貴斗米銀七錢

十一年甲午二月偽安西李定國統象二十餘兵數萬由雷廉至高州三月十七日破陽春搶掠一空進攻新會縣十二月京師兵至與平靖兩藩合擊敗之定國由陽春逃回廣西

十二年乙未春正月發粟賑難民

十三年丙申蔣以瓚擒西山賊首鴨仔二鴨仔四等

時巡按張某巡歷至縣斬賊於市

十七年庚子春正月詔蠲順治十二年至十五年逋賦改陽江高明

遊擊為春江遊擊

至康熙三年改設參將八年改設副將

康熙元年壬寅夏詔免順治十八年以前逋賦

二年癸卯冬十月命屯米全徵本色

順治初年罷前明衛所世襲撤軍伍尺籍設管屯官徵收屯糧本折色相半至是全徵本色

三年甲辰東山賊首伍振黃廷選等剽掠鄉村殺擄男婦高廉雷總兵栗養志討平之

自是曹洞茶園瓦盜三處各設一營把總一員統官兵八十名防守恩開各縣流寇遂不敢入據東山揆以安不忘危之道當永設勿廢焉

八年己酉春二月詔蠲康熙元年至三年逋賦

九年庚戌大有年斗穀錢七文

十年辛亥大有年斗穀錢六文

冬十年詔蠲康熙四年至六年逋賦

十四年乙卯夏高州總兵官祖澤清叛結連廣西偽伯馬雄十一月

卷十二

十

破陽春城大肆劫掠

十七年戊午閏三月大兵至高州澤清敗走廣西逆兵有竄至陽春七甲者勾引土惡劫掠潭水墟官兵擒倡亂者五人誅之地方以

靖

十八年己未夏六月頒諭十六條至陽春

二十六年丁卯夏五月詔免新加雜稅

二十八年己巳歲稔斗粟錢七文

二十九年庚子春正月詔直省遇蠲錢糧業戶免七分佃戶免三分

三十四年乙亥冬十二月詔蠲逋欠

三十六年丁丑大旱斗粟銀二錢知縣李敬脩煮粥以賑

四十一年壬午冬大雪

四十四年乙酉停里役

四十六年丁亥夏詔免四十三年以前逋賦

冬十月流賊劫潭水旋及上三都至東山鄉勇圍困之官兵隨至殺賊四十餘人數日賊黨解散

五十年辛卯詔免地丁錢糧并四十八年以前逋賦

五十二年癸巳春正月詔免地丁錢糧並遞年舊欠編造盛世滋生冊自五十年編審丁數定為常額續生人丁永不加賦

五十四年乙未十月歲稔

五十五年丙申定各縣丁銀配入地畝徵之

五十六年丁酉流賊李成才殺官兵於潭予岡兩廣總督楊琳命營將龔某督兵討平之

五十八年己亥流賊梁二伯統衆寇西門外水街邑壯士敖臨領營兵追至西水灣田縛之并殺其軍師大旗等遂移兵進剿西山賊生

卷十二

十一

擒賊首陳冬瓜

雍正元年癸卯六月詔墾田

各省可墾之田聽民相度地宜自墾自報地方官吏不得有所勒索起科之例水田仍以六年旱田遲以十年開墾多者官議紱由是陽春之民踴躍開荒

大有年

七年己酉詔蠲雍正四年以前舊糧秋七月豁免匠餉並入地丁額

徵八月蠲免次年庚戌地丁錢糧

八年庚戌九月裁陽春樂安驛丞

乾隆十年乙丑歲稔

十一年丙寅詔免地丁錢糧歲大稔

十三年戊辰歲稔

大錨灣積賊黎秀貞拒捕殺春江左營管隊盤日貴知縣錢逢泰守備周錫討擒之

十八年癸酉四月大水穀不熟知縣葉世度開倉平糶民賴以安

二十二年丁丑四月驟雨水漲南門外溺死十餘人山心寨民舍衝陷知縣姜山捐俸賑恤之

二十三年春不雨穀貴知縣姜山開倉平糶復捐俸倡賑城鄉紳士劉世槐楊祖燾等七十四人並捐米接濟董事者生員柯日旦容士速貢生柯爾常監生梁文海

四十三年戊戌穀貴斗米錢四百六十文知縣袁嘉德勸賑潭水墟施粥七日

四十五年庚子蠲免錢糧

五十一年丙午斗米錢四百二十文知縣方元賑粥潭水墟施粥

卷十二

十一

五十二年丁未穀貴人饑知縣郎煜奎倡題賑濟

五十四年己酉十月歲豐

五十五年庚戌詔免錢糧

六十年乙卯詔免五十六七八年逋賦

嘉慶元年丙辰詔免錢糧所有應徵火耗銀至次年帶徵

四年己未詔免乾隆六十年以前逋賦

五年庚申歲大熟次年六月復稔

六年辛酉八月大風毀屋拔木刺竹實

七年壬戌七月大風

八年癸亥刺竹實大饑四月斗粟五百六十文知縣彭昭麟倡題施粥潭水墟歲貢生李家翰弟家裕及諸士商捐米賑濟二十餘日全活者衆

二十四年己卯春詔免二十二年以前逋賦

以上錄舊志

道光八年戊子大水

十年庚寅七月颶風摧毀文廟殿瓦廡簷椽桷

十三年癸巳七月大水淹沒田禾廬舍無算邑中水患以是年為最

十五年乙未蝗 十二月大雪

二十五年乙巳二月大雨雹 六月大風雨七甲河水驟漲淹沒大

陳墟石碧各鄉民居山坪龍姓全村潰毀

二十九年己酉刺竹花

咸豐元年辛亥二月信宜賊何名科糾黨劫三甲屯聚數千人知縣陶應榮守備劉秉常聞警不赴救舉人劉承輦毀家懸賞募集鄉勇擊退之該匪由雙溶逸去

卷十二

十二

二年壬子二月大風 四月復大風

三年癸丑三月旱 八月蝗

四年甲寅五月蝗

七月庚申新興賊首江阿戊竄入黃泥灣練總吳瓜四踞城叛劉式恕黃者常呂文光出走江阿戊會合賊首黎四貴入城

時髮匪倡亂陽春震動知縣劉式恕任吳瓜四為練總諭嚴芝蘭等募勇芝蘭等勾串江阿戊入黃泥灣瓜四遂踞城叛守備黃者常事前奔避雙溶千總呂文光率營兵百餘退屯崆峒巖知縣劉式恕輾轉逃至三甲江阿戊會合黎四貴黎六入城許世昌曾亞仁劉載熙蘇毓莪謝經謨陳和勝等響應瓜四四貴踞縣署釋囚犯貼文告斂財物城中秩序大亂

閏七月己巳劉承輦率三甲潭水黃強那旦排埠岡尾鄉勇至馬水

進發討賊千總呂文光率營兵及西河堡鄉勇亦至與江賊戰於城西河干群賊大敗棄城逃

知縣逃至三甲時歲貢劉顯相倡議討賊舉人劉承輦與劉士鶴劉士輝劉榮輦劉士愈劉士暉劉士揆等歃血誓衆復城藍維鑾袁文益王成功陳大元等各招鄉勇三甲五姓共募得二千餘人劉士綱亦在潭水招集各堡勇丁七月丁卯知縣出駐潭水墟人心粗定拔貢韋賢澤至自黃菴承輦留與共事潭水舖戶暨劉韋吳林各姓壯勇復得二千餘人灌溪職員陳大受河正壩武生林滋喬坡脊武舉鄭宗揚岡尾生員李嶽等起勇援助守備黃者常亦至自雙濟閩七月己巳承輦率鄉勇自潭水出發與那旦排埠岡尾各堡勇集合馬水會師前進千總呂文光率營兵協同西河堡勇與江賊戰於城西殲賊數百墜河死者無算瓜四四貴棄城

卷十二

十四

遁兵勇振旅入城

閏七月癸酉賊首嚴芝蘭等復踞城營兵退潭水下二都勇退馬水黃泥峽韋賢澤劉德燦乞師陽江壬午師至古良水口會合那旦勇由水路進劉承輦率下二都勇由陸路進甲申再克復縣城

江黎各賊既遁城中紳士擬迎知縣回署賊首嚴芝蘭復約李環彭錫居彭錫隆謝經謨黎四貴等各股賊萬餘人蜂擁而來西河堡勇逆戰於河干敗績死者四十餘人各賊復踞城千總呂文光率營兵退潭水下二都勇退馬水黃泥峽時軍餉大絀劉承輦兄弟向富紳籌貸以應韋賢澤劉德燦赴陽江乞師於溫總鎮借兵一百名勇二百名平分給餉壬午舟泊古良水口承輦至犒師會同陳大受自招龍溪勇八百名溯流而上夜半至馬水承輦舍舟登陸馳至黃泥峽癸未奉知縣偕守備千總率下二都壯勇五千

餘人遵陸前進直指邑城西河堡勇隨同擊賊李環黎四貴吳瓜四潰退千總呂文光率兵勇復城曾亞仁許世昌劉載熙猶在東門墟列隊頑抗三甲練長劉榮淦手刃二賊陳大元繼至督勇生擒賊十人斬之城廂賊平丙戌知縣回城率文武官員以軍禮謁文武各廟巡視城廂內外以官署殘毀分兵留黃守備呂千總守城自率下二都各紳回潭水行營暫駐

八月癸卯賊首李環踞黃泥灣知縣劉式恕率下二都及西河堡勇協同陽江兵勇與守備黃者常千總呂文光會師進勦上三都各股匪平之

時賊首李環圖再襲邑城知縣偕劉承輦李嶽等至陽江再申借兵借餉之請溫總鎮陽許諾而實無意發兵劉承輦李嶽等力爭僅借兵四十名餉不與葉恆興助軍需一千貫蘇美昌介紹富

卷十二

十五

商借典錢二千貫陳大受謝紹德書債券事稍就緒知縣偕各紳馳回潭水集合兵勇不下萬人癸卯督師出發晚抵邑城守備千總率留守兵來會時李環糾合羅定賊五六千人踞黃泥灣知縣協仝武營及紳士劉承輦韋賢澤劉士鶴劉士輝袁文琪藍維鑾陳大元王成功曾廷英陳國章劉德燦劉英弼李嶽林滋喬陳大疇吳政濬李應平鄭宗揚劉顯耀等於甲辰師發邑城城中紳士柯泰柯昭德張成掄游雲章往來接應關支口糧乙巳師次合水賊聞氣奪宵遁上三都紳士陳守衷等率鄉勇先至廩生蔡慶廷林士元生員林衍桂進士莫蒼榮舉人顏有莊貢生莫泰崧等先後率勇沿途迎接殷聲動天知縣見上游兵力既厚下二都壯勇盡調慮有變戊申分撥兵勇以半留守地方以半隨征辦賊是日獲灣口賊首伍水流等誅之嚴正彪殲賊首嚴骨仔六於家黎四

貴黎六潛遁知縣督勇搜捕燬其廬己酉師至黃泥灣以次焚燬白哨那梳青山石望藕塘茅逕各賊巢獲匪黨梁勝張純通等三百餘人戮之乙丑旋師時茅逕陳姓賊積惡數世圖死灰復燃陳守衷偵悉密報知縣即令嚴正彪率松柏勇為一隊莫泰崧率大洞勇為一隊謝樹仁率高岡勇為一隊守衷自率黃泥灣合水勇居中策應九月辛未會隊進勦松柏練長嚴家麟先登衆小卻手招後隊三路合圍大戰生擒賊首陳和勝陳齊勝於陣暨匪黨三百餘人聚其族而殲焉謝紹德獲謝經謨陳守衷獲黎六蘇龍章蘇毓莪皆送縣正法李環黎四貴亦伏誅於羅定上游之賊悉平八月丙長羅定信宜賊首陳阿風謝締錫等聚衆於上下峯劫古牛逼龐洞潭水三甲勇禦之千總呂文光率兵馳援賊聞風逃遁知縣劉式恕繼率勇清鄉餘匪肅清

知縣時在上游督師羅定信宜賊首陳阿風謝締錫等在上下峯地方聚衆數千人出山口洞逼龐洞潭水三甲震動時潭水紳士劉士綱力請巡檢汪曾裕汎外委呂剛帶勇救援三甲紳士劉承翰劉士輝等發各姓壯勇裹糧助勦戊午賊下山焚劫古牛圍攻龐洞范建熙范建猷懸重賞殺賊三甲藍姓勇塘壠劉姓勇領上賞為先鋒逐賊至茶亭嶺賊自上而下各勇自下而上至半嶺相遇交鋒塘壠勇以鳥槍首發橫擊搖旗賊中之顛復寨旗殊死鬪別賊圍藍姓勇山岡戰良久日已晡三甲劉姓勇千人居後隊聞報疾馳至山下列陣從旁鎗擊斃賊甚衆賊驚退即護塘壠勇下山又復同上山救出藍姓壯勇計共斃賊百餘人是日劉承輦至自上一三都癸亥合各股壯勇進古牛入山逐賊賊由山口坳走三甲之山坪劉姓勇出黎埗西岸堵截賊退東安之風洞九月庚午

賊由風洞出雙澹承輦等率三甲各姓勇過蘊水堵禦議以偏師由黎埭到千翠截賊歸路劉榮輦率大隊由蘊水進駐腰蒙謀定待發癸酉黎明拔營疾行三十里圍賊於雙澹墟連環發槍斃賊數十人賊困而猶鬪雙澹土勇素無約束先棄旗遁各股勇亦牽動劉承輦劉士暉劉士揆等力遏陣後結隊徐退兵勇死者十人把總譚拔熊遇吳許翬救免翌日呂千總率兵自邑城來潭水高塘劉姓瓦窰塘吳姓各勇繼至軍聲復振乙亥復自蘊水拔隊齊進賊以屢戰傷亡不敢再抗竄入茂名境丙子知縣率上三都勇至駐三甲辦賊獲賊張道騫等五十餘名駢戮之丙戌入龐洞直造山口洞邊界焚賊巢淨盡謀報陳阿風餘匪盡殲於茂名鵝公埭遂班師十月丙申獲土匪楊道莊羅天建等置之法下游遂告肅清

卷十二

十七

知縣劉式恕有幹才以誤用吳爪四致敗其轉敗為功者劉承輦陳守衷與諸紳之力也賊平大吏嘉賞官紳升獎有差劉承輦倡義功高口不言賞劉令擬請以知縣用辭不受後改獎國子監學正計軍興半載動用軍需五萬金有餘皆商民籌辦不支官帑縣文案庫項倉儲無失監獄重犯緝獲過半其首禍之吳爪四記委曾大猷追捕至那龍獲之就地正法主謀刑書陸瓊魁逃往頭堡友人賴應瓊家道遇梁建隆堡內壯勇圍擒伏誅唯外匪江阿戊彭錫居錫隆鍾昭陳阿風謝締錫等內匪嚴芝蘭許世昌曾亞仁劉載熙崔亞燦豬仔元陳亞旺等在逃未獲

五年乙卯大修城垣

去冬亂定後知縣劉式恕議將城垣平基拆造邑紳劉承輦陳守衷贊助越一年工竣用三萬六千餘金皆邑士民樂輸

六年丙辰夏四月大風六月大水淹浸彌月

七年丁巳春大旱荒斗米千錢

自六年八月不雨至是年四月始得雨

夏五月信宜賊許花二流劫雙濬千總翟超羣禦賊敗績

秋七月股匪張勾七竄擾縣境知縣周振璘募勇追擊殲之

初賊流劫石菴知縣周振璘率兵勇禦之大敗紳士柯其昌陣亡
兵勇死者十三人賊大劫馬水潭水而去劉承輦聞警赴縣獻策
招募西山土勇陳玉繩等推誠撫納佐以鄉勇協力追勦轉戰數
縣卒圍賊而殲焉

九年己未七月大水八月蝗

十年庚申四月饑斗米錢五百文

十一年秋八月信宜賊首李四劫三甲鄉勇禦之斃賊無算

卷十二

十八

九年秋九月信宜賊楊雙四李四等劫三甲雙濬至是李四復劫
三甲雙濬三甲七甲勇合力禦於黎埗西岸戰失利七甲勇退守
羅吉莊與賊相持六日三甲勇擎檯槍架樹上斃賊數人賊驚退
鄉民喊殺助勢三甲七甲勇前後截擊賊望風而潰自相踐踏及
被擊而死者不可勝數急遁去

冬十二月犵匪首韓端戴子桂率衆入踞思良都之岑洞逼攻上三
都之黃泥灣合水等處地方

初恩開等縣多客籍寄居與土人積不相能地方官不善處理釀
成土客相鬪時恩平民譚三才購洋鎗數百桿聯合各縣鄉勇與
匪戰匪不能敵退入邑屬思良都之岑洞匪有衆十餘萬推客籍
舉人韓端廩生戴子桂為首領旗書六縣同心天下無敵上三都
鄉勇往攻之匪伐木塞路勇輕敵逕進匪焚嶺蟻出瀾山遍野縱

橫衝殺勇大敗死者無算十二月庚辰匪乘勝分隊一由大洞陷黃泥灣一由瓦盞陷合水見人即殺見屋即焚慘無人道同治元年壬戌正月狝匪大舉攻縣城知縣吳璇率武生梁家秀督兵民登陴守禦擊退之

匪既攻陷上三都正月望旬直撲縣城分劫西河堡石菴等處知縣櫻城固守梁家秀督守兵及民壯晝夜登陴守禦連發巨砲斃匪十餘人匪百計攻城卒不能近遂燒東門墟暨雅舖街退去乃轉掠岡尾及陽江之第八恩平之那龍復返岑洞

夏四月狝匪復出上三都圍攻平坦堡水坑石堡攻陷之匪返岑洞後復出合水圍攻水坑石堡居民閉堡門拒守呼救不至炮石盡絕匪蟻附登堡屠殺數百人無得免者

秋七月賊首李四楊雙四復出劫下二都各堡

卷十二

十九

時李楊兩匪已受髮逆偽職聲勢益大衆愈多分隊由山坪龐洞雙溶掃劫如三六七八甲及潭水之龐洞鳳南現堯鳳北各堡無不遭其蹂躪鄉勇無抵禦力躲避遠方或險固之石巖洞堡八甲十餘圍堡悉被攻破惟王姓鎮南一堡固守幸全匪在三甲墟設立紅局為久踞計搜劫屠殺所至一空民不遠避即死亡流離轉徙田廬蕩然

二年癸亥正月髮逆首領鄭金率大隊由信宜出駐三甲劫陽江塘口織篔

鄭金時為髮逆正元帥率步隊數千馬隊數百自信宜至三甲龍騰鄉旋經潭水企坎攻陽江塘口織篔兩處劫財物無算

三月髮逆首領劉昭由八甲率隊劫電白水東墟途遇卓軍敗績楊雙四斃於陣

髮逆副元帥劉昭協全楊雙四率隊數千人至八甲轉劫水東適副戎卓興部隊運餉回高州相遇於沙琅之官珠嶺昭即指揮逆衆圍攻截搶卓部聞信發兵馳救擒殺甚衆楊雙四殲焉

五月都司侯勉忠奉督檄率勇來春勦匪

去冬劉承輦自北京假旋至邑城見邑鄉遍遭匪害晉省謁各憲乞撥兵援勦時高郡用兵餉項不能分撥承輦力任由本邑籌助晏制軍遂飛檄侯都司勉忠帶勇三千人迅赴援救復札委承輦與羅紳升楛在城設立果毅局付鈐記得具劄條陳承輦即隨全侯軍馳抵邑城招募鄉勇數千協助侯軍往上游進剿玆匪該匪衆遂悉數竄入下二都之企坎黃菴屯聚侯軍屯駐馬水相機進剿承輦與升楛乃招徠商賈籌濟軍食邑城遂解嚴嗣後屢與髮玆兩匪逆戰擒斬不下千餘人

卷十二

二十

九月三七甲鄉勇圍攻賊首李四於雙塔墟

李賊自去秋出劫三七甲等處遂踞以自固是年八月髮逆鄭金劉昭等投誠雙濬民蘇義向受偽職亦到果毅局請降劉承輦准其殺賊贖罪遂令督帶三七甲團勇圍攻李賊於雙濬墟適高州撫匪吳公謨稱奉高州總局命令來招李賊各勇信以為然吳公謨縱李賊逃去各勇憤甚將吳公謨及餘黨七十二人網送邑局詳請就地正法

十一月玆匪首韓端戴子桂糾衆踞三甲

玆匪由上三都退屯企坎黃菴忿劉承輦請兵驅逐發承輦父榮玆墓糾衆萬餘圍攻三甲各鄉勇逆戰傷亡百餘人退守三甲墟相持月餘子藥盡糧食絕餓斃者塞途劉士誌從墟闌頂繩縋而下見韓賊言和韓賊佯允士誌返開尾闌迎賊入一面放墟內紳

勇商民開頭闡逃出時狝匪佈滿逃出者皆刺殺至死血流成河其冒刃逃生者僅數十人計屠戮人數二千有奇方十里內村落為墟

三年甲子正月副戎卓興率師自陽江進與侯都司軍會師夾擊狝匪盡殲

劉承輦憤狝匪之猖獗去冬十月與知縣議委拔貢劉榮琳往高州稟請崑宮保燾分兵來援卓副戎興奉令帶兵勇九千人赴剿師次雙捷謀搗匪巢狝匪益恨擁衆萬餘入陷三甲於是三甲有去年十一月之禍承輦厚集餉項詣卓營剴切請求是年正月卓副戎進擊狝匪一戰而殲匪甚夥其企坎黃菴守巢之衆悉奔入三甲承輦往來卓侯兩軍商定卓軍由水路進駐潭水侯軍由陸路進駐龐洞夾攻兜擊匪直撲卓營承輦督鄉勇隨卓軍擊之卓

卷十二

一一

軍張兩翼而進匪盡披靡斬馘千餘級奪旗幟器械無算匪由東安之西山竄新興逃歸五坑卓侯兩軍尾追破其巢所餘殘匪分別安插廉瓊兩州邑境匪患始平

辛酉壬戌癸亥三年間上三都遭狝匪之禍民不聊生流離失所賴羅紳升楛設法周恤下二都則迭受西山賊及髮匪狝匪蹂躪各姓聚族而居者該計死亡數幾過半田疇鞠為茂草鄉村廬舍存者十不一二亂後田價大賤斗種錢數百文

四年乙丑羅定東安賊復擾上三都

五年丙寅郭中丞崑燾奏請豁免陽春元二兩年錢糧得旨照准邑遭髮狝兩匪連年擾亂田地盡荒糧稅無出劉承輦籲請各憲賑恤郭中丞據情人奏是年冬奉旨豁免陽春縣同治元二兩年全數錢糧

七年戊辰春大饑斗米錢八百文

閏四月地震有聲如雷

秋大獲斗米錢百四十文

八年己巳二月雨雹大如拳如斗

九年庚午春大旱饑

十年辛未四月大雨

十二年癸酉六月大水災

水漲數丈幾成澤國數日後始退

十三年甲戌閏六月大水災

沿河民居畜產多漂沒知縣王守仁邑紳曾朝忠沿河拯溺救免
甚衆

秋八月大風壞屋拔木

卷十二

一一一

光緒五年己卯知縣蕭丙堃建造試院於城內五循祠之左

六年庚辰下二都匪首劉天倉棍聚黨拜會於潭水鳳北堡之合口
廟

自髮逆平定後邑內三合會萌芽於正知縣蕭丙堃通令緝捕各
匪稍斂迹

十年甲申大風拔木壞屋

十三年丁亥大熟石穀一千四百文

秋七月地震

十四年戊子三合會匪首陳獅子典聚黨拜會於合水之鬱斗坡

十五年己丑秋七月地震

十六年秋七月賊劫三甲墟鄉勇劉子豐王丕華追擊之

下二都自剿平髮狃兩匪後居民安處二十餘年至此匪禍復作

鄉勇劉子豐王丕華等聞警跟追十餘里至六甲黃坡堡背山僻
小路屋將匪破獲奪回贓物并擒匪數名送縣懲辦

十七年辛卯地震

冬十二月大雪結冰成塊竹木枯魚畜凍死

十八年壬辰陽江匪首譚永清竄擾平坦堡知縣烏爾興額督鄉勇
擊散之

上三都匪禍自是復熾時三合會匪陳獅子典誘人拜會附後甚
衆

冬十一月大雪

平地盈尺山巔積至數尺遠望如琉璃屏數日始消

十九年癸巳刺竹花實

二十二年丙申秋七月地大震

卷十二

一三三

二十三年丁酉刺竹花實

秋大獲石穀壹千文

二十四年戊戌刺竹花實

冬十月會匪周二等踞灣口墟把總蒙紹勳率勇會鄉練擊散之

二十五年己亥春大疫

秋八月大旱

冬十一月介字營防軍來邑駐防旋調去

二十七年辛丑歲稔斗米錢百八十文秋旱

二十八年壬寅大饑石穀漲至錢十千文知縣楊自明開倉平糶

二十九年冬十月王崧奉督檄來剿會匪辦理清鄉保甲並招撫天

堂匪首李北海等衆

三十年甲辰秋七月賊劫輪水堡屋面塘村千總謝榮芳率鄉勇赴

援斃於陣

時會匪猖獗榮芳倉卒赴救奮不顧身卒以匪衆兵單被匪擊斃
知縣許南英捐貲優卹奉匪主入祀義勇祠

秋九月高州陳總鎮率兵來剿會匪

是年會匪四起徧肆焚劫下二都尤甚三甲劉姓秋祭荆山宗祠
被匪搶奪祭器族紳憤甚設立族團令父老縛送為匪子弟懲治
馳稟高州鎮派兵來剿陳總鎮親率營兵百餘並檄飭茂名河坑
軍屯吳姓紳士帶團勇百餘人為助駐營三甲沿河而下勒各堡
紳士懸賞捕匪送辦焚燬匪屋無算舟至坡脊旋師

冬十月八甲會匪黃祥東黃東福等糾黨攻破大陳圍堡斃紳劉顯
琳吳仁齋王治卿並團勇十八名

三十一年乙巳春廣東福軍統領記名提督柯壬貴都司黃輔文奉

卷十二

一四

督檄來邑剿匪

時會匪披猖柯統領暨黃統領各率所部抵三甲駐營嚴令三六
七八甲及潭水黃菴澗水那旦懸賞緝匪經各堡網解著名會匪
百餘名來營正法并搗燬酒頭村蕉蕩埗鄉匪巢數處柯營駐紮
學宮黃營駐紮合水墟是冬柯統領調署陽江遊府三十三年黃
統領調署平海參將

三十二年夏四月大雨

是年四月十八日有黑蛟自八甲白水河出潦水陡漲數丈淹塌
民居無算

三十四年戊申刺竹花實

秋大雨

冬旱

宣統元年夏四月大雨

時連旬淫雨河水暴漲山多崩潰民居被淹沒冲塌不少知縣鄭業崇請撥款賑恤蠲免錢糧

二年庚戌除夕大風雨

三年辛亥秋九月辛卯民軍集城外揚言攻城知縣鄒兆夔千總劉朱華棄城出走

以上錄採訪冊